



SICONDA SESSIONE URDINARIA DI U 2017
RIUNIONE I 21 E 22 SITTEMBRE

N° 2017/O2/056

DUMANDA URALE POSTA DA U SGIÒ GHJUVANNI BIANCUCCI
À NOME DI U GRUPPU « FEMU A CORSICA »

OGETTU : RIALIZAZIONE DI U PRUGETTU DI CUNSERVATORIU DI A FICA MEDITERRANEA

O Sgiò Presidente di u Cunsigliu Esecutivu,

Ghjorni fà, quattru ghjorni pè esse precisi, si hè fatta in Peri a XIVa "Fiera di u Ficu".

Cum'è l'anni prima u successu popolare hè statu dinù custindi è si hè festighjatu l'arburu è u so fruttu cumu disidè.

Ma quantunque, a Casa Rurale di Peri, animatrice pudente d'issa animazione, aspetta sempre h'ellu fussi rializatu u prugettu di cunservatoriu di a fica mediterranea, un prugettu iniziatu sò più di dece anni.

Da u 2008 digià, è po dopu cù una cunferenza di stampa, in situ, u 4 di nuvembre 2009, duv'elli ci eranu parecchi eletti presenti è trà quessi u Presidente di l'Uffiziu di l'Ambiente u Sgiò Polverini, u cartulare era fattu publicu.

Prisentava un ogettivu triplice, purtandu à tempu nantu à a necessità di fà un censu da pudè stabilisce un ripertoriu precisu di e varietà, di assicurà ch'elli sianu salvati i varii ceppi identitarii è di rimette in lume a simbolica culturale di a fica in u Mediterraneu.

Da ùn scurdà si di nunda ci vole ch'è vo spiate chì, da u 2002, l'OEC era intervenutu pè un studiu purtatu à l'epica da u GAL "i trè Valli" di Leader+.

Da tandu ùn si hè mossu più nunda è ancu malgratu un'interpellazione da Petru Ghionga u 3 di maghju 2011, propiu quì ind'è stu locu.

Di fattu, ellu, da risponde à a mo dumanda urale, hà ricunnisciutu l'interessu d'issu cartulare, ma hà messu in avanti e difficoltà di messa in opera ligate cun l'indispunibilità di e lenze è dinù i pochi mezi finanziari di l'OEC.

Via, da tandu, u cartulare dorme..

Ma in u 2015, a Casa Rurale di hà interrugatu a cumuna di Cutuli è Curtichjatu inquantu à a dispunibilità di duie à trè ettare da pudè ci rializà u Cunservatoriu. Di dicembre 2016, u cunsigliu municipale hà a decisu di risponde di sì à issa dumanda.

Dunque pudemu entre in una fasa preuperaziunale s'è tremindui à tempu l'OEC ma dinù l'ODARC decidenu di sustene propiu u prugettu.

Aspettemu a vostra risposta.